

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 15.11.2012 18.05 Uhr auf 94.0 bzw. 87,7

Moin, leev Toehörers,

dat harr `k neet docht, dat Kickers Emden tegen Rood Witt Damme mit 2:3 in de Landesliga up egen Platz verlesen dee. Dat lag wall doran, dat de Spölers van Kickers Emden na ´n paar Week Spölpaus neet so recht in Schwung kwammen un an disse Dag ok gottserbarmelk spölten. Heel besünners de Spölerree in de 2. Halvtied brochen de meisten van de 221 Toekiekers, de Intree betahlt harren, up de Palme.

Aber nu toe dat Spöl. Al in 8. Menüte broch de Dammer **May Moormann** na ´n Freetrapp de Gast mit ´n Koppball mit 1:0 in Föhren. Damme truck sük dorna toerügg. Kickers Emden kwamm wall up, man an de Straafruumgrenz was Schluss. Blot **Thilko Boekhoff** broch of un toe Gefahr för de Gast, meest aber ok blot na Freetrappen. So skoot he in de 15. Menüte ´n Ball an dat Lattenkrüz. Un wat keeneen verstunn, Kickers spölte vör de egen Straafruum de Ball quer, wat man al in de F-Jögdmannskupp lernt, dat man dat neet maken sall.

De Ball wurr van Kickers Emden ok so faak verloren, dat Damme de een of anner Tor al in de eerst Halvtied maken musst harr.

Man dat tweed Tor för Damme full eerst in de 60. Menüte ut goed 25 Meter dör **Vladislav Aumann**. Kickers Torwart **Karsten Buss** wull in de Eck hechten, aber he glee ut un kwamm dormit neet mehr an de Ball.

Kickers Emden leet sük aber neet heel un dall hangen, dat mutt man seggen. Un in de 64. Menüte na ´n Flank van **Tobias Bruns** kunn **Carlos Santos da Luz** de Ball sogaar over de Torstreek brengen.

Dorna dochen de Toekiekers noch, dat Kickers dat Spöl dreihen kunn. Man nix dorvan. Damme mook in de 70. Menüte dör ´n Koppball van **Ercan Ablak** dat dart Tor för Damme. Ok hier sach de jung Torwart Buss neet goed ut. Villicht lag dat an de Nerven. Keen tein Menüten later muss **Arne Janssen** na de tweed geel Kaart van d` Platz. Kickers versöchte noch alles, de Instellen was in Rieg, man de Spöleree neet. Nadem Dammes Torwart **Stefan Segatz** in de 90. Meüte noch ´n Skoet van **Denis Alexandrenko** an de Querlatt drücken kunn, stoffde **Martin Habben** of un verkörte up 2:3. Man för ´n Utgliek was dat toe laat.

Up de Geburtsdagsfier an disse Abend van de Emder Stadtsportbundbaas **Hans-Jürgen Wehmhörner** in Cafétje, he is 70 Jahr old worden, was dat Resultat natürelk ok Thema van de 53 Gasten. Heel besünners **Reiner Mensen** kwamm dorover gaar neet weg, dat Kickers mit 2:3 verloren harr. Dat hett lang dürs, bit he weer so recht Freid an de Fier in Cafétje harr.

Sönndag geiht dat nu na Bad Rothenfelde. De stahn upstünns up de 2. Tabellenplatz. Man dat seggt neet völ. Wenn Kickers Emden weer so spölt, as in eenige Spölen vör dat Spöl tegen RW Damme, dann kann de Mannskupp ok in Rothenfelde bestahn. Dat seggen ok de Kickers-Fans in de Fan-Forum. Neet bang maken laten, seggt Edelfan „Kurrat“ ut Dortmund. Un „Pöhli“ is mit ´n 2:2 toefree. Man eenige menen, dat dor nix toe haalen is. Ik meen, bang maken deit un dürt neet gellen. In Foetball is al mögelk – un dorum löv ik an de jung Kickersmannskupp ok in Bad Rothenfelde.

´n bietje beter mook dat lesd Wekenenn de **Damenmannskupp** van Kickers Emden. De hebben in Langen, dat liggt bi Lingen, tegen de SG Langen/Neulangen 1:1 spölt. Trainerin **Hedwig Heiken** wuss na dat Spöl neet, ob se sük freien of doch ´n bietje trurig wesen sullte.

De Gastgeber gung dör 'n heel dumm Tor mit 1:0 in Föhren. Man de Emderinnen leten sük neet bang maken un kwammen tein Menüten later toe de verdeente Utgliek dör **Sabine Köhler**.

Kickers spölte mit: **Bakker, Soujan, Meints, Heiken, Dinkgräve, Buß, Post, Flessner, Metze, Köhler, Löning un Aper**.

So, nu noch as alltied, 'n kört Foetballwitz.

Foetballspöl tüsken Holland : Düütskland güstern Abend in de Kiekkast. Berthold sitt heel gemütlich in sien Sessel un seggt: „Dat is ja keen schlecht Spöl, aber de Toren fehlen!“ Doruphen kickt sien Frau kört up dat Fernsehbild un skellt: „Büst du blind? Dor stahn doch twee.“ Dat Spöl gung 0:0 ut, was neet völ.

Noch eens, bevör ik toe d' Schluss koom. Vannabend hebb ik in uns Sportheim in Petjem weer 'n Verkoopschau organiseert. Wenn man 22 Ehepaaren dortoe inladen deit und de ok komen, kriggt man 700 Euro in de Mannskuppkasse - dat is egaal of man wat köfft of neet. Ik laad all Jahr dortoe in. Villicht kann 'n Mannskupp van Kickers Emden so wat ok maal dorföhren. Deiten (Geld) kann man ja alltied bruken.

Leev Toehörers van Radio Oostfreesland,
dat was dat weer maal för disse Week.

Ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem (Petkum).